

欽
定
全
唐
文

欽定全唐文卷一百二十九目錄

前蜀主王建

改衙廳爲宮殿詔

置東宮官屬詔

勸農桑詔

命編開國以來實錄詔

郊天改元赦文

答梁主書

示羣臣手書

誠子元膺文

前蜀後主王衍

幸秦州制

制科策問

上魏王繼岌牋

鏡銘

後蜀主孟知祥

下蜀國教

起兵西川示諸州榜

收闐州示西川勝

收下夔州并黔南勝

討平董璋勝

後蜀後主孟昶

勸農桑詔

與周世宗書

結河東蠟彈書

上宰臣樞密使狀

戒石文

金史卷之三
南漢第三主劉晟

遺馬希隱書

南漢後主劉鋹

興王府千佛寶塔讚

楚廢王馬希廣

請發兵擊朗州奏

楚後廢王馬希萼

上南唐元宗乞師表

欽定全唐文卷一百二十九

前蜀主王建

建字光圖許州舞陽人初爲列校田令孜養爲假子拜諸
衛將軍大順中累加檢校司徒成都尹劔南西川節度副
大使知節度事管內觀察處置雲南八國招撫等使景福
二年加同平章事乾寧四年攻殺東川節度使顧彥暉遂
據有兩川之地光化三年加中書令命以西川節度使兼
東川武信軍兩道都指揮制置等使賜爵瑯琊王四年改
封西平王天復三年加守司徒進爵蜀王七年梁受唐禪

遣使宣諭拒不納遂稱帝國號大蜀改元武成光天元年
六月殂年七十二僭諡神武聖文孝德明惠皇帝廟號高
祖

改衙廳爲宮殿詔

帝君之居上應辰象朝貢臻集華夏會同宮闕殿閣之深
嚴臺省府寺之宏壯須分名號以美一作觀瞻況我肇啟
丕圖頻有嘉瑞允協上元之貺式光萬世之基至於廚廩
之標題倉庫之曹列並宜從革用永維新

置東宮官屬詔

王者經世馭民以保安於烝人曷嘗不講求賢碩以輔元子故漢開博望唐重承華左右正人自躋於治其以東宮爲崇賢府凡文學道德之士得以延納訪問無或自尊以蔽爾之聰明

勸農桑詔

昔劉先主入蜀武侯勸其閉關養民十年而後舉兵震搖關內朕以猥眇託居人上爰念蒸民久罹干戈之苦而不暇力於農桑之業今國家漸寧民用休息其郡守縣令務在惠綏無侵無擾使我赤子樂於南畝而有豳風七月之

詠焉

命編開國已來實錄詔

自古王者之興善惡之迹不泯者有史臣傳之丹青載之
平章事張格儒術領袖文高於世著述之體自侔班馬可
專編纂開國已來實錄

郊天改元赦文

圓蓋方輿萬彙共資其覆載春生夏長四時不息於推遷
所以茂成歲功寧遂物性帝王取象文質遞興遵革故之
令猷數鼎新之至理朕上膺眚命俯徇樂推宗廟告虔孝

思旣展郊丘備禮嚴配式遵欽承享國之符允叶奉天之
道羣祀咸秩有感必通雲龍方覩於在天雷雨須聞於作
解且湯開三面延景祚六百餘年漢革五刑繼丕圖二十
四世皆以恤辜宥罪勸善興仁特行滌蕩之恩用致治平
之化自唐朝運改土德數終初乃召寇以纏兵竟至遷都
而滅國賢良塗炭朝市邱墟生人旣失其所天大事須歸
於有土遂至蠻夷瀝款士庶傾心謂蜀都同章武之時兼
漢嗣絕山陽之號共陳天命屬在朕躬一從踐位以來倍
軫臨深之懼每念生靈塗炭刑政猶繁因告類於穹旻合

流恩於屬縣紀年定歷旣正鴻名布澤行春式均和氣可
大赦天下改唐天復八年爲大蜀武成元年正月十日昧
爽已前大辟罪已下罪無輕重已發覺未發覺已結正未
結正見繫囚徒常赦不原者咸赦除之唯十惡五逆及屠
牛鑄錢故意殺人捏窠造印結聚徒黨逃走背軍合和毒
藥私鹽茶麴持仗行劫官典犯枉法贓兼踰濫身名冒受
官爵囹圄之內官吏用情致令冤濫不問有贓不在赦限
左降官不問罪輕重并與量移其有情無狡蠱事不涉邪
者委中書門下酌量矜貸便與矜復授官州縣典史及諸

色人配流在遠已經懲斷者並宜釋罪放歸兼有軍人百姓先因公事關連逃避諸州縣鎮不敢放歸還者亦任却歸本貫所在不得勘問擾攪朕自援旗誓衆仗鉞平戎廓定封疆安保生聚克成帝業實用武功每思將帥之勞宜獎初終之效其在城及東川山南武定武信武泰等道并兩路前軍諸鎮都頭節級將士等一昨即位日雖已各有頒賜既經大禮更示殊恩應都知兵馬使已下至節級官健今有優給各有等第處分稼穡雖登黎元未泰每於旦夕常所焦勞將漸致於昭蘇已累行其矜放但念方屯師

旅難闕賦征緣同切於乂安宜共資於贍給自去年八月已後十月已前繼有指揮併蠲逋欠非無惠澤下及烝人尚慮疲羸未息艱苦畿內諸州及諸州府應徵今年夏稅每貫量放二百文今年正月九日已前應在府及州縣鎮軍人百姓先因侵欠官中錢物或保累填賠官中收沒屋舍莊田除已有指揮及有人經管收買外餘無人射買者有本主及妻兒見在無處營生者並宜給還却據元額輸納本戶稅賦冬選之人例聞羈旅常思任用以救棲遲兼勸進官僚人數不少朕昨纔登寶位更布優恩或擢在班

行或委之州縣凡選用略盡搜羅其間或有謬結前銜妄
稱入仕旣未辨其真僞又可哀其困窮是用銓衡冀分玉
石切在精研選士撫實推公自執規繩勿隨請託但曾經
赴任委不敗官不犯刑章又無贓污告身周備考課分明
便仰依資注官銓司不得稽滯如有失墜告身無以自明
但有失墜時公憑及於本任官處取得文解者並準例參
選然則自唐朝兵革之後踰濫尤多附勢力者未必有材
抱孤直者或聞無位自今以後委有司博求幹濟慎擇端
良諳熟吏途詳明法律先能潔已方可理人就中令錄之

尤難切在銓衡之精選或有節度刺史上表論薦皆須審
諸行事顯著才能保無苛虐之心方允奏陳之命如聞失
舉必罪所知諸州府或有賢良方正能直言極諫達於教
化明於吏材政術精詳軍謀宏遠韜光待用藏器俟時或
智辨過人或詞華出格或隱山林之跡或聞鄉里之稱仰
所在州府奏聞當與量材敘用自唐室傾淪梁圖纂奪上
國俄成於茂草中原莫有其遺民三百年之文物一空數
千里之生靈無主星辰旣紊運祚俄遷指王氣之東沈聽
頌聲之西起率土之黔黎老幼競獻臣心滿朝之文武忠

賢皆陳天意克隆基業合重獎酬應内外文武官等或賜功臣名號或與一子出身兼進勸官資以旌勲業並當續有處分朕頃事唐臣嘗居親衛受藩鎮封崇之貴著冊書鍾鼎之勲至於朝右公卿方面侯伯皆契忘家之誓俱同許國之誠其歿身王事之中遇禍賊庭之内言念及此痛憤良深應自僖宗朝凡在有功文武大臣顯忠孝者並委中書門下追贈仍搜訪骨月量材錄用又在閬州起義之日應有隨駕大將效命功臣或遘疾以淪亡或當鋒而天枉皆是捐軀爲主臨難喪身殊功無日而暫忘遺烈千年

而不泯並委中書門下抄錄次第各與追贈有子孫者特授官榮所冀澤被幽明仁霑存沒又自朕剖符之始分閫已來副予委用之心匡贊勲庸之士同甘共苦竭節輸誠推公不避於流言臨事唯思於盡瘁則有故武信軍節度使張琳操持勁直才術縱橫成今日之鴻基自斯人之懿績不享朝天之祿遽興失手之悲言念前功常思厚報宜追贈太尉以報幽冤其嗣子更加正官仍賜章綬故山南節度使王宗滌早膺任用累著勲勤征行不憚於風塵陳敵常先於士卒論其實效可謂勞臣無何以富貴生驕災

殃自掇不守初終之節遽萌悖慢之心驗人情而共憤滿
盈定國法而難私斷割遂行典憲深用矜傷當景運之初
興在故臣之可念宜加洗雪用慰幽冥宗滌並却還在身
官爵故茂州刺史張造故蜀州刺史李師泰故邛州刺史
李簡故眉州刺史張勅故漢州刺史王宗裕都知兵馬使
劉璋奉禮蓋獲張全真張行立韓在田威等並宜追贈朕
自臨蜀國實庇齊民皆資先哲之威靈獲王故都之城邑
方憑幽贊以永天休上答元功宜尊舊號先主昭烈皇帝
宜委中書門下追崇尊號虔備冊儀忠武侯諸葛亮別加

美諡追贈王爵應名山大川靈祠聖跡皆豐凶所繫水旱
是司並宜追贈公侯以酬元貺朕爰自統臨八國同心諸
藩部落首領已下宜差使臣各賜詔勅分物宣諭其見在
鴻臚禮院入朝蕃客等各賜分物續有勅旨處分刺史縣
令身皆受職寵在分憂非唯效答於恩榮亦在保全於終
始將申報國只計安人其有徭役不均刑法不中鄉縣凋
弊稅賦逋懸必當分命使臣大明黜陟若清廉可獎課績
有聞或就轉官資或超加任用並舉勸懲之命以彰悔過
之名太倉及諸州縣受納斛斗並仰大府寺準舊例校勘

逐年給付所司除本分耗剩外不得加一升一合致百姓
積累逋懸如有固違必行朝典其有外州遠縣官吏等輒
徵估價並許百姓詣闕論訴不計官職高卑並正刑名處
分在京百司禁囚徒推劾案成皆招本罪本官詳斷只據
所申儻陷深文便行極法或恐推司人吏抑遏代書既不
坐其本情實慮遭其枉法自今後委御史臺常加覺察若
有冤濫便具奏聞必當別遣推窮重行懲斷致理之源無
先養老化民之本尤在恤孤或矜黃髮之年或念白華之
節衰老者宜加矜恤孤惻者亦在撫安應國內有耆老年

八十已上賜米二石九十已上賜米三石一百歲已上賜米五石兼絲絹酒肉有差並仰所在長吏切加安存其有不幸者量與津置殯送仍撫其孤弱義夫節婦孝子順孫並加旌表門閭終身優假國之教化庠序爲先民之威儀禮樂爲本廢之則道替崇之則化行其國子監正令有司約故事速具修之兼諸州應有舊文宣王廟各仰崇飾以時釋奠應是前朝舊制或有開國新規制勅之所未該教化之所未備或刑法不中或倫序有乖則諫臣不可不言宰執不可不奏且謗木之設本俟諍臣匭函所收先覽冤

狀所以凡關利病悉要聞知自今已後或事有便宜理非允當並須旋具論奏共議改更必當留折檻以旌賢無或懼觸鱗而避事應南郊行事亞獻終獻攝事行禮官吏等改轉優賜並候續勅處分應飛龍閑廐內作器仗諸雜工巧黃衣三衛四色細仗掌扇黃鍾典鼓等亦各委所司分析姓名申奏當議優賞駙馬都尉普恩之後仍各賜一子八品正員官赦內有未該恩例及合條流事件各仰所司啟請施行開國之初旣勤行於德惠改元之後尤企望於樂推惟是革弊從新去華務實有利於民者不得不用有

害於政者不得不除公平必致於民安富庶自成於國霸
恩雖不恡法且無私赦宥者各仰自新釐革者皆宜共守
俾從蕩滌永致清平敢以赦前該恩事相告者以其罪罪
之挾藏軍器亡命山澤百日不首復罪如初赦書日行五
百里仍付所司牒至準賜勅故牒

答梁主書

大蜀皇帝致書於大梁皇帝閣下竊念早歲與皇帝共逢
昌運同事前朝俱榮倚注之恩並受安危之寄豈期王室
如燬大事莫追橫流泛濫於八方衰釁凌夷於九廟此際

與皇帝同分茅土共統邦家扶危者力旣不宣握兵者計
無所出建忝列同盟之分幸居平蜀之功所宜治兵甲以
固封疆聚征賦以修進貢望星使而經年不至指雲鄉而
就日無期遠聞皇帝應天順人開基立極拯生靈於塗炭
示恩信於豚魚東南之王氣咸歸河洛之殊祥畢至四門
盡闢百度惟貞竟無意於興邦止施仁而濟物以此內量
分限不在經綸七十州自可指揮八千里半因開拓遂至
萬民叶議八國來朝爰徵史冊之文亦有變通之說且東
漢亂離之後三國齊興西周微弱之時六雄競起俱非恃

強逼禪皆以行道濟時雍容於揖讓之前輕重於英雄之內況西蜀開山立國燒棧爲謀稱雄雖處於一隅避亂曾安於二帝鼎峙之規模尚在山呼之氣象猶存永言梁蜀之歡合認弟兄之國今蒙皇帝遠尋舊好專降嘉音俱無間謀之嫌再敘始終之約疑慮則春冰共泮開通則東海可歸光榮遽被於子孫暢遂咸敷於朝野今則盡焦勞而勵已用勤儉以帥賢常瞻偃草之風以繼用天之道又蒙厚加賜貺別降珍奇十驥聯鑣六龍并駕稱德曾參於萬乘呈才皆過於千金載觀戀主之心益勵懷恩之志寶帶

輟異方之貢名香加遠國之琛奇鋒利逾於雪霜雅器價
齊於金玉入用多慚於未識捧持方喜於初觀望恩而一
日三秋仰德而跼步千里自此榮遵天路繼遣星槎絨章
不候於飛鳶裂帛豈勞於繫雁忻榮慰喜併集此時敬以
專使盧卿等回略陳所志幸望開覽

右件鞍馬及腰帶甲冑槍劒麝臍琥珀玳瑁金稜椀越瓷
器并諸色藥物等皆大梁皇帝降使賜貺雕鞍撼玉堅甲
爍金十圍希世之珍六轡絕塵之用槍森蛇櫜劒耀龍鋒
金稜含寶椀之光祕色抱青瓷之響上藥非蜀都所紀名

香從外國稱奇遠有珍華並由惠好顧酬謝而增媿仰渥澤以難勝捧閱品名實慚祇受

示羣臣手書

朕比遭亂離以干戈定秦蜀賴卿等忠勤夾輔遂正名號奄有神器兢兢業業懼不負荷幸賴天地之靈廟社之貺方隅底定民黎樂康二氣協和五穀豐稔然萬幾之大夙夜勤勞邁此篤疾藥石勿救太子雖幼有賢德次不當立卿等固請於外妃后篤愛朕未能違立爲儲君勉力匡襄無墜我邦家之休命

誠子元膺文

吾提三尺劒化家爲國親決庶獄人無枉濫恭儉畏慎勤勞慈惠無一事縱情無一言傷物故百官吏民愛朕如父母敬朕如天地汝襁褓富貴不知創業之艱難更汝之名上應圖讖勿驕勿矜勿盈勿忌惟敬惟誠惟謙惟和內睦九族外安百姓赤心待羣臣恩信愛士卒刑罰人之命也無徇愛憎奸邪國之賊也無信讒構絕咬遊之娛察聲色之禍然後能保我社稷君我民臣吾蚤莫誠勗恐汝遺忘當置於几案出入觀省

前蜀後主王衍

衍字化源先主第十一子初封鄭王爲左奉駕軍使先主
殂襲位改元乾德六年後唐莊宗伐蜀明年唐師入成都
帝出降唐遣使殺之於秦川年二十八天成三年追封順
正公

幸秦州制

蓋聞前王巡狩觀土地之慘舒歷代省方慰黎元之後望
西秦封域遠在邊隅先皇帝畫此山河歷年征討雖歸王
化未浹惠風今耕稼旣屬有年軍民頗聞望幸用安疆場

聊議省巡

制科策問

炎漢致治始策賢良巨唐思皇爰求茂異講邦國治亂之體陳天人祥祲之原豈角虛文蓋先碩德朕念守器之重識爲君之難思得奇才以凝庶績因舉故事以紹前修子大夫抱道逢時投書應詔必有長策以副虛懷何以使三農樂生五兵不試刑獄無枉賦斂無加以何策可以定中原以何道可以卜長世朕當親覽汝無面從

上魏王繼岌牋

衍叩頭言伏以五帝三王竟歸於代謝有家垂國孰免其
廢興苟大命之革新願轉禍而爲福衍誠惶誠恐叩首伏
以衍先人頃以受唐封冊列土坤維自霸一方於茲三紀
乃者因夷門之構逆偶中國以喪君勉副推崇遂開興業
衍謬爲世子獲紹舊基而以幼沖不得負荷尋遇大唐皇
帝中興聖運再造鴻圖輝赫大明照臨下土存修嘉好仰
恃恩盟感覆燾於堯天將驅馳於禹貢忽審王師討伐部
內震驚靡敢當鋒幸思歸命伏惟殿下位尊上嗣德寶元
良騰少海之波瀾動前星之秀彩親乘象輅勞履劒關已

得萬民之歡心坐恕斯人之死罪今則完全府庫守遏邑
居率文武以陳誠輿棺櫬而納款伏惟殿下特宏哀鑒保
證奏聞亦存諸典刑貯在肺腑庶幾先人之靈猶享血食
之祀免支離於眷屬得敬養於庭闈惟聖君之明慈係殿
下之元造衍無任危迫殆越戰懼激切之至謹差私署檢
校司空行尚書兵部侍郎歐陽彬軍使韓知權等奉牋以
聞

鏡銘

煉形神冶瑩質良工當眉寫翠對臉敷紅如珠出匣似月

停空綺窗綉幌俱涵影中

據抱璞簡記作煉形神冶瑩質良工如珠出匣似月停空當眉

寫翠對臉傳紅光含晉殿影照秦宮鐫書玉篆永鏤青銅

後蜀主孟知祥

知祥字保允邢州龍岡人李克用鎮太原以爲親衛軍使後唐天成中累加太尉兼侍中封平原公長興二年擊敗董璋得梓綿龍劔普果閬蓬渠九郡遂并有兩川四年加檢校太尉兼中書令行成都尹劔南東西兩川節度使管内營田觀察處置統押近界諸蠻兼西山八國雲南安撫制置等使封蜀王明年稱帝國號蜀改元明德是年殂年

六十一僭謚文武聖德英烈明孝皇帝廟號高祖

下蜀國教

取威定霸乃公侯權變之方捨爵策勲乃皇王敘酬之典
其或兵屯萬旅地廣三川周環列國之山河奄有全蜀之
封部儻不從權而徇衆則稽錄效以報功今稟命於中朝
得專制而行賞但念承世家之餘慶受旌鉞之殊榮自領
成都於茲半紀窮奢極侈固斷意而不爲講武教民在安
邊而有作往歲方勤述職務保永圖不幸諸藩構成深隙
此際主兵將帥爭陳排難之功運策實僚咸展出奇之略

因興武旅分蕩渠魁累破竹以焚枯連開疆而拓土其次
諸司奉職庶吏推誠咸著勲勞豈忘獎答一昨聖上以顯
分忠佞遂降冊封礪岳帶河銘大君之異寵輅車珠冕表
列國之殊榮仍示優崇俾行墨制上自藩方之任下及州
縣之官凡黜陟幽明許先行而後奏自可保不僭不濫之
典賞立功立事之人必無患於不均庶有覲於允當布告
遐邇咸使聞知

起兵西川示諸州榜

蓋聞皇王御下恩信乖而叛離臣子事君猜忌生而權變

固不可刮席而忍恥膠柱而移音開戶牖以啟戎長根芽而稔患以至舉戈問罪誓衆言征旁庇齊民式求多福某國朝懿戚受命莊宗自節制於西川遇鼎移於東洛且以時變則憂喪君有君因盡節而傾誠遂梯航而入貢五年之內發運無虛積數五十萬緡纍給朝中之費此則勵勤蓋於天子欲表率於諸侯宇內皆知人誰不見至於屢加官秩亦荷寵光不幸間諜潛興窺覷顯露於閭中而立節就列鎮而益兵搖動我軍民控扼我吭背頻將異議累具上聞冀羈軫於懷柔希稍安於方面而朝廷不以爲德轉

深其疑竟乖魚水之歡自絕雲龍之契某與東川相公已
聯姻好況密封圻朝聞雞犬之聲暮接笳鼙之響地里雖
分於兩鎮人心何異於一家勢比同舟事資共濟今與東
川點檢馬步軍十五萬人騎分路往武信利閔路黔夔等
州問逐制置之由與興屯集之衆其行師法令別載條章
務期晏寧必無侵虐況王氏開國久霸成都東則鐵鎖於
瞿唐北則泥封於大散自是子孫失守將相離心合在蜀
之烝人固未忘於霸主某因衆多之感舊奮武旅以開疆
佇遣四民各安其業然後花林步月錦水行春繁華何讓

於往年爵祿重新於此日凡百士庶宜體端倪

收闔州示西川榜

昨者兩川以朝廷自生疑貳不體忠良信讒賊之間言致諸侯之離德始則闔州節度使李仁矩兩來奉使頻此覘窺謂於果闔之間便是控臨之地妄興謀畫濫置節旄及奸計之遂心猶陰邪而未已數聞奏報背請兵師欲結禍階自爲戎首所以東川相公慮其稔惡須議摧凶連興貔虎之師共破豺狼之窟自今月二十九日酉時得東川相公來書云二十五日夜三更三點親領兩川大軍四面圍

襄攻打閬州城池至其日平明打破斫到李仁矩首級并捉到都指揮使姚洪馬軍指揮使王景步軍指揮使費暉等訖餘城下見機來投指揮使都頭已下便與賞給安存兼本城軍人百姓並不傷動外餘拒敵黨類殺戮無餘此則天贊兵威人叶勇力遂至元凶斬首同惡就擒我師四合以環圍逆壘一攻而瓦解捷書雷迅喜氣山橫想與士民同多慶快見便乘勝前進攻收利州只期反掌之間更俟克敵之捷

收下夔州并黔南勝

今月二十一日據峽路行營討伐招收使狀報黔南節度使去今月二十七日將手下元戎兵士拋本州下水奔竄尋差衙隊指揮使朱偓部領左右飛棹并諸指揮兵士乘戰船十五隻往黔南安慰至今月二日午時回其黔南節度使今見在渠溪團點元隨兵士及旋添水軍却有五百餘人排比小戰船候寧江應接兵士到却欲歸復本州其朱偓當日辰時部領戰船往渠溪襲逐至午時與賊軍相見交戰趁下水約百餘里至酆都壩頭殺獲賊軍一百餘人斬黔南内外都指揮使郭太尉吳近思張瓊等三十餘

人奪得衣甲器械不少收獲牌印四副其黔南節度使則
攜餘黨乘小船沿流直下忠州者竊以大舉舟師遠征峽
路旗鼓纔聞其下瀨雲檣尋指於上游連降郡城繼收營
監勢且疾於破竹聲有類於藝蓬今則更閱捷書屢聞勝
策況寧江軍以黔南爲肘臂之地以渝合爲饋運之衢我
已斷之彼何望矣節帥弃城而竄遁裨將兼隊而追擒數
俘馘以旣多收鎧甲而亦衆指期蕩定以固封寓凡曰軍
民攸同快慰

討平董璋榜

蓋聞皇天無親唯德是輔明神不昧稔惡則亡逆賊東川
節度使董璋包藏禍心負背盟約暴興士馬急寇封圻迎
鋒而尋沒全軍單馬而竄歸本府昭武司徒統領大衆追
襲餘妖則有前陵州刺史王暉覩其將亡因圖轉禍梟斬
董璋父子雙獻其元克保軍城待余旌旆念其智勇足可
嘉稱且謀不自於衆人罪止歸於元惡旣除心腹之患永
固邦國之基某見親往東川慰諭軍民

後蜀後主孟昶

昶字保元初名仁贊先主第三子起家西川節度行軍司

馬先主稱號進檢校太保東川節度使同中書門下平章
事先主殂襲位仍以明德紀元五年改元廣政二十八年
宋師入成都後主降授開府儀同三司檢校太師兼中書
令秦國公越七日薨年四十七贈尚書令追封楚王諡恭
孝

勸農桑詔

刺守縣令其務出入阡陌勞來三農望杏敦耕瞻蒲勸穡
春鷓始轉便具籠筐蟋蟀載吟即鳴機杼

與周世宗書

七月一日大蜀皇帝謹致書於大周皇帝閣下竊念自承
先訓恭守舊邦匪敢荒寧於茲二紀頃者晉朝覆滅何建
來歸不因背水之戰爭遂有仇池之土地洎審晉君歸北
中國且空暫興敝邑之師更復成都之境前時秦成階鳳
實爲下國之邊陲其後漢主徑自并汾來都汴浚聞征車
之未息尋神器之有歸伏審貴朝先皇帝應天順人繼統
即位奉玉帛而未克承弓劒之空遺但傷嘉運之難諧適
歎新歡之且隔以至前載忽勞睿德遠舉全師土疆尋隸
於大朝將卒亦拘於貴國幸蒙皇帝惠其首領頒以衣裘

偏裨盡補其職員士伍徧加於糧賜則在彼無殊於在此
敝都寧比於雄都方懷全活之恩非有放還之望今則指
揮使蕭知遠馮從謹等押領將士子弟共計八百九十三
人已到當國具審皇帝迴開仁愍深念支離厚給衣裝兼
加巾屨給治程之驛料散逐分之緡錢仍以官僚之迴還
安知所報此則皇帝念疆場則已經幾代舉干戈則不在
盛朝特軫優容曲全情好永懷厚義常貯微衷載念前在
鳳州支敵虎旅偶於行陣曾有拘擒其排陣使胡立已下
尋在諸州安排及令軍幕收管自來各支廩食並給衣裝

却緣比者不測宸襟未敢放還鄉國今旣先蒙開釋已認
冲融歸朝雖愧於後時報德未稽於此日其胡立已下今
各給鞍馬衣裝錢帛等專差御衣庫使李彥昭部領送至
貴境望垂宣旨收管矧以昶昔在齟齬即離并都亦承皇
帝鳳起晉陽龍興汾水合敘鄉關之分以陳玉帛之歡儻
蒙惠以嘉音即佇專馳信使謹因胡立行次聊陳感謝詞
莫披述伏惟仁明洞鑒垂念不宣

結河東蠟彈書

早歲曾奉尺書尋達睿聽丹素備陳於翰墨歡盟已保於

金蘭洎傳弔罰之嘉音實動輔車之喜色

上宰臣樞密使狀

竊念頃自北京即隨先子洎臨西蜀嗣守餘基自量小國之封疆常阻大朝之正朔伏自皇帝位登宸極禮盛郊禋令預梯航願同臨照而以阻遙障險稍易歲時今則遠勞王師恭行天討有征無戰詎可抗威棄甲倒戈尋皆效順具陳降款上達冕旒所希者存濟活於蒼生報劬勞於老母忠惟奉主孝則養親固於生平無所覬望許男銜璧已蒙解釋之儀虞舜垂衣佇保安全之望丹誠備寫雪涕難

勝伏惟某官叶贊萬機懷柔八表迴敷恩信並及幽遐願
垂前席之言特加敷奏冀遂保家之懇終養晨昏烏反哺
以知恩竊將此喻雀銜環而報德以荷生成倚賴感銘陳
詞罔盡遐瞻德宇但憑虔誠今遣親弟仁贄詣闕上表待
罪

戒石文

朕念赤子盱食宵衣託之令長撫養惠綏政存三異道在
七絲驅雞爲理留犢爲規寬猛得所風俗可移無令侵削
無使瘡痍下民易虐上天難欺賦輿是均軍國是資朕之

爵賞固不踰時爾俸爾祿民膏民脂爲民父母莫不仁慈
勉爾爲戒體朕深思

南漢第三主劉晟

晟初名宏熙南漢先主襲第四子封晉王光天二年春弒
第二主玢自立改今名乾和十六年八月殂在位十六年
年三十九僭謚文武光聖明孝皇帝廟號中宗

遺馬希隱書

武穆王奄有全楚富強安靖五十餘年正由三十五舅三
十舅兄弟尋戈自相魚肉舉先人基業北面仇讎今聞唐

兵已據長沙竊計桂林繼爲所取當朝世爲興國重以昏
姻覩茲傾危忍不赴救已發大軍水陸俱進但令相公舅
永擁節旄常居方面

南漢後主劉鋹

鋹初名繼興第三主晟長子封衛王乾和十六年八月襲
位改今名大寶十四年宋師至降於軍門封恩赦侯太平
興國五年薨在位十四年入宋九年追封南越王

興王府千佛寶塔讚

大漢皇帝以大寶十年丁卯歲勅有司用烏金鑄造千佛

金史卷之三
寶塔壹所七層并相輪蓮花座高二丈二尺保龍闕有慶
祈鳳歷無疆萬方咸闕於清平八表永承於交泰闕善資
三有福被四恩以四月乾德節設齋慶讚謹記

楚廢王馬希廣

希廣字德丕楚文昭王希範母弟武穆王殷第三十五子
文昭薨時諸弟中名希萼者最長宜襲位長直都指揮使
劉彥瑫等稱遺命奉希廣權軍府事漢天福十二年以希
廣爲天策上將軍武安軍節度使江南諸道都統兼中書
令封楚王乾祐二年加太尉三年十一月希萼入寇陷長

沙遂自立賜王死

請發兵擊朗州奏

臣當道去九月內量發兵士往朗州招安戶民不料偶失
威嚴遂中姦便須謀補卒爰議班師朗州自聞當道抽退
已來狂謀益甚又探得荆南繼差人下淮南與廣州三處
結搆荆南欲取澧朗州廣南攻桂州淮南欲取湖南兼即
日淮南支鄂州管內租稅衷私令荆南供給朗州且如山
結連可知事勢其朗州已入附於淮甸又納款於荆南興
破家亡國之心作瓜剖豆分之勢兼誘草賊燒却近封顧

基局而危若綴旒視黎庶而困於塗地弦衰柱促言發涕
流伏乞聖慈念以臣四世勤王三面受敵欲興師旅動礙
寇讎望特降絲綸聊差驍虎亦知朝廷北面託落分兵處
多故不敢大段撓於兵力只乞差借許蔡鄉軍三五百人
馬一千騎內得王師二千來人夾帶南渡只到澧州屯駐
以斷淮南與荆南援助之路不勞血刃只仗朝廷則當道
出兵不難克復安危繫慮翰墨難窮庶回雷電之光以收
盪平之捷謹差押衙焦文諫馳奏披瀝以聞

楚後廢王馬希萼

希萼武穆王庶子希廣旣襲位希萼與師爭國陷長沙遂
自稱楚王南唐保大九年二月遣使入貢於唐唐以王爲
天策上將軍武安武平靜江寧遠等軍節度使兼中書令
封楚王九月馬步都指揮使徐威等囚王於衡山縣尋立
爲衡山王十二月入唐唐主以爲江南西道觀察使守中
書令鎮洪州仍賜爵楚王十年十二月復入唐唐主留之
數年薨於金陵謚孝恭

上南唐元宗乞師表

昔先王早以勛業基有楚國不幸即世顧命之夕顯令兄

弟以天倫紹立庶奉宗廟獲享國祚無何嗣君不延永命
奄棄社稷訃告至日臣不勝痛切膚骨血泣頤睫即時奔
走哀庭冀處苦由用竭臣子之孝不圖天未殄禍孽豎構
隙間離我戚屬汨亂先序潛阻兵戈將謀勦絕苟不更圖
殞在朝夕故臣敢遠遣行价殫布腹心惟君存先王之昔
好軫大國之武威許出兵援以附不腆庶俾盜黨免弄凶
器

欽定全唐文卷一百三十目錄

吳越武肅王錢鏐

賜童顏拜西扇都巖將誥

謝鐵券表

鍾廷翰攝安吉主簿牒

授張蘊江陰令牒

劉仁規等改補節度散子將牒

太宗譜序

錢氏九州廟碑記

羅城記

天柱觀記

鎮東軍牆隍神廟記

開舜井得重華石記

新建風山靈德王廟記

真聖觀碑

建廣潤龍王廟碑

投龍文

吳越文穆王錢元瓘

乞復父舊號表

請建龍冊寺奏

楊瑫等改補節度子將牒

吳越忠懿王錢俶

宗鏡錄序

黃妃塔記

梵天寺經幢記

新建佛國寶幢願文

閩第六主王羲

奏晉帝書

欽定全唐文卷一百三十

吳越武肅王錢鏐

鏐字具美杭州臨安人乾符中爲董昌裨將乾寧初累授
開府儀同三司同中書門下平章事封開國公二年討董
昌授檢校太尉兼中書令領鎮海鎮東等軍節度使四年
平田頔賜鐵券五年授檢校太師光化三年封南康王四
年加守侍中改封彭城王天復二年改封越王天祐元年
改封吳王梁開平二年進封吳越王兼淮南節度使揚州
大都督充淮南四面招討制置使加守太保四年加守尚

書令兼淮南宣歙等道四面行營都統貞明二年加諸道
兵馬元帥尋進天下兵馬都元帥龍德三年冊封吳越國
王後唐同光三年依梁前授官爵長興三年三月薨年八
十一唐主詔以王禮葬諡武肅

賜童顏拜西扇都巖將誥

制左軍同十將充西扇都巖將顏早係轅門久居巖界星
霜屢換警察無欺寡人自襲丕圖廣施慶澤睠茲勤瘁宜
示陟遷克固前脩更期後獎可銀青光祿大夫檢校太子
賓客兼監察御史上柱國充十將餘如故

謝鐵券表

恩旨賜臣金書鐵券一道臣恕九死子孫三死者出於睿
眷形此綸言錄臣以絲髮之勞賜臣以山河之誓鐫金作
字指日成文震動神祇飛揚肝膽伏念臣爰從筮仕逮及
秉麾每自揣量是何叨忝行如履薄動若持盈惟憂福過
禍生敢冀慎初獲末豈期此志上感宸聰憂臣以處極多
虞慮臣以防閑不至遂開聖慮永保私門勛以功名申諸
帶礪以上八字一作屈以常刑宥其不死雖君親囑念皆云必恕必容而臣
子爲心豈敢傷慈傷愛謹當日謹一日戒子戒孫不敢因

此而累恩不敢承此而賈禍聖主萬歲愚臣一心臣誠惶
誠恐頓首頓首

鍾廷翰攝安吉主簿牒

勅淮南鎮海鎮東等軍節度使牒將仕郎試祕書省校書
郎鍾廷翰牒奉處分前件官儒素修身早升官緒寓居雪
水累厯星霜克循廉謹之規備顯溫恭之道今者願求錄
用特議掄材安吉屬城印曹闕吏俾期差攝勉效公方倘
聞佐理之能豈愆超升之獎事須差攝安吉縣主簿牒舉
者故牒

授張蘊江陰令牒

前攝蘇州長洲縣令文林郎前守洪州都督府參軍張蘊
牒奉處分宰千里之邑寄百里之命異懦則絲棼繩亂用
剛則土曠民離苟得適中庶幾可守前件官窮經任已明
吏藩身御札承制正授常州江陰縣令表次錄奏仍牒舉
者

劉仁規等改補節度散子將牒

勅淮南鎮海鎮東等軍節度正隨身劉仁規等牒奉處分
前件人久在軍門志懷忠幹或比差隨逐皆推奉上之心

或職列巡封備顯歲寒之節今者驂隨歸使合議甄升各加超擢之恩以示獎酬之寵事須改補節度散子將仍牒知者故牒乾化四年四月日牒使尚父守尚書令吳越王

大宗譜序

若夫古先垂訓賢哲修身莫大於上承祖禰之風下廣子孫之孝是故堯舜之化理天下其先則曰敦睦九族然後平章百姓協和萬邦詩不云乎無念爾祖聿修厥德是知爲人子人臣之道無過於尊奉祖先揚名立身者也念予遠承祖派紹襲宗風爰自幼年志攻學術屬世道之屯否

憤豪猾之僭昏擲筆硯於天目之山練干戈於錢塘之城
推赤心而效順仗一劒以除奸勦薛朗於姑蘇累施擒縱
殄漢宏於甌越粗展機謀鎮越安吳匡君輔國自兵符而
陞郡印以廉車而建節旄綰三鎮之藩方受六朝之委任
尊居師右位極人臣雙封兩國之榮冊掌中臺之任家藏
玉冊手執瓊珪襲華袞而駕輅車錫寶券而森門戟榮光
祖禰寵被親姻子孫皆忝勲華宗族盡沾爵祿長源衍慶
累葉承庥考本尋根實由祖德況賜甲第於茅山之下改
鄉名於故府之前尋準勅書建制私廟昭三代追崇之盛

耀祖先贈典之榮存歿光輝雲仍浹慶但以歷世緜遠慮
乖次序余總戎政之暇考閱譜圖之祥乃命區分別爲卷
軸上自少典次及彭錢孚公更錢氏之文讓公爲過江之
祖高曾積善德厚流光棣萼旣繁蘭芽轉茂遂各堂構析
以諸房切慮百代之後流派愈多難窮婚宦之由有墜祖
宗之業今則先鋪血脈次列尊卑粗明纂襲之風永奉烝
嘗之道傳示來葉勿墮箕裘

錢氏九州廟碑記

若夫本大枝長源深派遠哲賢之後靈慶常存我錢氏實

黃帝之苗彭祖之裔三季之前兩漢之際軒冕勲業輦映
士林祖德家聲迄於唐史臨安縣有遺廟九所水旱祀焉
俗謂錢氏九州廟年代寢遠銘記不存空仰威靈罔知官
宦鏐始戡越難遂忝珪符復救吳災又叨節制因歸寧故
里厯覽遺蹤噫承天子之優恩亦吾祖之餘慶也因以俸
錢新其廟宇式刊貞石用播清塵鏐常閱家牒至讓公未
嘗不執卷移時恍若神會讓公字德高仕後漢剛毅武勇
學通韓詩時太守薛固舉孝廉遷厯陵安章等郡牧後固
爲廷尉所枉公朝賀之際大呼稱冤順帝令虎賁以矛楯

夾腋間所陳之事公辨舌如流神色不異百辟莫不俯伏
遷征東大將軍破賊功高爲徐兗二州刺史後十四代孫
達字通甫出身入仕與讓祖相類梁大同中爲廬陵王國
侍郎羽林監及陳祖龍飛遷東海太守娶瑯琊王氏生九
子皆相次爲將軍郡守因移家江南子孫隆盛初立祠堂
年代綿邈居人祀焉故老相傳九州廟或作洲字非也元
顯聖跡出在汀河故有此誤也予鑒兵之暇與紀其事以
示來者云第一造公字子榮陳蕩寇將軍遷高密二州牧
第二瑋公字慧高陳太建中由句容令拜神武將軍遷都

督虜山鎮使押禦北藩至唐武德中鎮唐溫滔州終於王
事第三勢公字道摹陳太建中除伏波將軍又拜和戎將
軍鎮威將軍鎮關山第四環公字德同太建中亦拜伏波
將軍理新蔡第五瑤公字德珪太建中拜宣威將軍鄱陽
王府中兵參軍至德四年除驃騎大將軍第六珍公字智
武至德四年拜昭遠將軍隋大業十年授溪陽令唐武德
七年與郡王平湯祐改授宜春第七瑱公字軒直太建十
四年拜宣猛將軍隋大業九年平滄海道征與大將軍周
法尚西討破賊楊元威加朝散大夫第八璿公字子玉仕

陳爲親信子弟內衙直大業九年平滄海道征與瑱同破
楊元威加朝散大夫第九瑜公字子橫亦爲親信子弟羽
林宿衛同破賊賞功與瑱璿並同兄弟九人顯達相次時
人以爲荀龍賈虎無以相若也烈祖顯榮煥赫前史鏐忝
爲後裔竊繼清風特創新祠兼剖貞石時玉輅東還新主
登極兩浙渠魁已殄十州內獲安將示後代宗支知於祖
禰文德元年七月七日記

羅城記

大凡藩籬之設者所以規其內溝洫之限者所以虞其外

華夏之制其揆一焉故魯之祝邱齊之小穀猶以多事不時而城況在州郡之內乎自大寇犯闕天下兵革而江左尤所繁併余始以郡之子城歲月滋久基址老爛狹而且卑每至點閱士馬不足迴轉遂與諸郡聚議崇建雉堞夾以南北矗然而峙帑藏得以牢固軍士得以帳幕是所謂固吾圉以是年上奏天子嘉以拙政優詔獎飾以爲牧人之道其盡此乎俄而孫儒叛蔡渡江侵我西鄙以翦以逐蹶於宛陵勁弩之次泛舟之助我有力焉後始念子城之謀未足以爲百姓計東眄巨浸轉閩粵之舟楫北倚郭邑

通商旅之寶貨苟或侮劫之不意攘偷之無狀則向者吾
皇優詔適足以自策由是復與十三都經緯羅郭上上下
下如響而應爰自秋七月丁巳訖於冬十有一月某日由
北郭以分其勢左右兩翼合於冷水源綿亘若干里其高
若干丈其厚得之半民庶之負販童髦之緩急燕越之車
蓋及吾境者俾無他慮千百年後知我者以此城罪我者
亦以此城苟得之人而損之已者吾無媿與景福二年十

一月日記

天柱觀記

天柱觀者因山爲名按傳記所載皆云天有八柱其三在中國一在舒州一在壽陽洎今在餘杭者皆是也又按道經云天壤之內有十大洞天三十六小洞天如國家之有藩府郡縣遞相稟屬其洞天之內自有日月分精金堂玉室仙官主領考校災祥今天柱山即真誥所謂大滌洞天者也內有隧道暗通華陽林屋皆乘風馭景倏往忽來真蹤杳冥非世俗所測而況大江之南地兼吳越其峯巒西接兩天眼之龍源次連石鏡之嵐岫東枕浙江之迢派可謂水清山秀兼通大海及諸國往還此外又有東天目西

天目及天竺之號得非抗蒼崕於穹昊聳絕壁於雲霄立
天爲名以標奇特耶若乃登高望遠則千巖萬壑金碧堆
疊龍蟠虎踞靈粹滋孕代生異人非山秀地靈之所鍾襲
其孰能與於此乎就中天柱風清氣和土腴泉潔神蛇不
螫猛獸能馴自漢武帝酷好神仙標顯靈跡乃於洞口建
立宮壇歷代祈禳悉在此處東晉有郭文舉先生得飛化
之道隱居此山羣虎來柔史籍具載乃於蝸廬之次手植
三松虬偃鳳翹蒼翠千載今殿前者是也洎大唐創業以
元元皇帝爲祖宗崇尚元風恢張道本天皇大帝握圖御

宇授籙探符則有潘先生宏演真源搜訪神境宏道元年
奉勅創置天柱觀焉仍以四維之中壁封千步禁彼樵採
爲長生之林中宗皇帝玉葉繼昌元關愈闢特賜觀莊一
所以給香燈於是臺殿乃似匪人工廊檻而皆疑化出星
壇月砌具體而微則有被褐幽人據梧高士挹澄泉之味
息青蘿之陰葉天師法善朱法師君緒吳天師筠暨天師
齊物司馬天師承禎夏侯天師子雲皆繼踵雲根棲神物
表骨騰金鎖名冠瑤編出爲帝王之師歸作神仙之侶金
錯標字翠珉流芳昭晰具存不俟詳錄其餘三泉合派雙

石開扉藥圃新池古壇書閣各有題品足爲耿光鏐此際
蒙聖朝疊委藩閫綰闔之封略統句踐之山河寵極蕭
曹榮兼渾郭緬懷斯地實邇維桑素仰真風備詳前事但
以此觀刼置之始本對南方後有朱法師相度地形改爲
北向雖依山勢偏側洞門其洞首陰背陽作道宮而不可
致左右崗壠與地勢以相違背洞門而不順百靈使清泉
卻侵白虎致使觀中寥落難駐賢能皆爲尊殿背水激衝
之所致也乾寧二年鏐因歷覽山源周遊洞府思報列聖
九重之至德兼立三軍百姓之福庭於是齋醮之餘徧尋

地理觀其尊殿基勢全無起發之由致道流困窮二時而不辦香燈竟歲而全無醮閱遂抗直表上聞聖聰請上清道士閻邱方遠與道衆三十餘人主張教跡每年春秋四季爲國焚修鏐特與創建殿堂兼移基址山勢有三峯兩乳兼許邁先生丹竈遺跡猶存遂乃添低作平減高爲下改爲甲向是五音第一之方而乃添培乳山卻爲主案尋即一二年內法主兩霑渥恩道侶益臻常住咸備青牛白鹿堪眠琪樹之陰絳節霓幢不絕星壇之上得不因移山勢而再振元風者哉尋又續發薦章奏閻邱君道業聖上

以仙源衍慶真派流輝方瑤水以遊神復華胥而入夢欲
聞無爲之化欣聞有道之人勅賜法號爲妙有大師兼加
命服雖寒棲帶索之士不尚寵榮在法橋勸善之門何妨
顯赫其次畢法道士鄭茂章生自神州久棲名嶽元機契
合負笈俱來繆幸揖方瞳常留化竹副妙有大師三元八
節齋醮同修福旣薦於宗祧惠頗霑於軍俗尋發特表蒙
鴻恩繼賜紫衣焚修於此其大殿之內塑天尊真人龍虎
二君侍衛無闕其次別舩上清精思院爲朝真念道之方
建堂廚乃陳鼎擊鐘之所門廊房砌無不更新天風每觸

於庭除地籟時聞於窗戶兼爲親繇觀額以炫成功非矜
八體之能貴立永年之志妙有大師閭邱君靈芝稟異皓
鶴標奇誕德星躔披靈霓洞朝修虔懇科戒精嚴實紫府
之表儀乃清都之輔弼加以降神之地即舒州之天柱山
也遊方有志躡屨忘疲自生天柱之前駐修天柱之下察
其符契信不徒然此乃修崇實同搜抉所謂道無不在代
有其人爰自開基至於功畢備仙家之勝槩暢聖祖之真
風遂錄畫圖封章上進奉光化二年十一月二十七日詔
旨勅錢鏐省所奏進重修建天柱觀圖一面事具悉我國

家襲慶仙源遊神道域普天之下靈跡甚多然自兵革薦興基址多毀況茲幽邃豈暇修營卿考一境圖經知列聖崇奉親臨勝槩重葺仙居仍選精慤之流虔備焚修之禮冀承元貺來祐昌期豈唯觀好事之方抑亦驗愛君之節既陳章奏披翫再三嘉歎無已想宜知悉冬寒卿比平安好遣書指不多及懿夫地出靈阜天開洞宮三皇之前真聖非一莫匪乘虛躡景出有入無雖或挂於傳聞不可知其名氏皆分洞天而理即大滌居其一焉天柱觀即漢以來迄於唐室修真之士繼躡清塵當四方俶擾之時見一

境希夷之趣今也仙宮嶽立高道雲屯六時而鐘磬無虛
八節之修齋罔闕有以保國家之景祚福兩府之蒸黎鏐
今統吳越之山河官超極品上奉宗社次及軍民莫不虔
仰神靈遵行大道時也聖明當代四海歸心忝蒙委以東
南封爵功臣兼頒金券家山衣錦兼兩道之油幢上承一
人倚注之恩次乃是正真護持之力元元至聖崇敬福生
大道真科是無爲化致乃及身於此合刊貞石用俟後賢
時光化三年七月十五日記

鎮東軍牆隍神廟記

若夫陰陽共理之規人神相贊之道傳於史冊今昔同符
切以浙東地號奧區古之越國當舟車輻湊之會是江湖
衝要之津自隋末移築子牆因遷公署據卧龍之高阜雉
堞穹崇對鏡水之清波風烟爽朗緬惟深固宜叶冥扶故
唐右衛將軍總管龐君諱玉頃握圭符首臨戎政披榛建
府吐哺綏民仁施則冬日均和威肅則秋霜布令屬牆愛
戴黔庶訶謠尋而罷市興嗟餘芳不泯衆情追仰共立嚴
祠鎮都雉之岡巒宰軍民之禍福殿堂隆邃儀衛精嚴式
修如在之儀仰託儲靈之廕往載釁生劉氏妖起羅平子

躬臬審謀恭行天討數年擐甲兩復越牆皆資盼蠻之功
以就戡平之業特爲重增儀像嚴潔牲牢邇來四野無塵
重門罷析丁卯歲揚旌東渡巡撫軍民躬奠椒漿目瞻靈
像每暢吳風越俗共歌道泰人安昔爲兩鎮之疆今作一
家之慶遂馳牋表請降崇封所冀朝恩與漢牧齊標美稱
共泰禱對聳尋蒙天澤果賜允俞頒崇福之嘉名升五等
之尊爵其所奉勅命具列如左嗚呼人惟神祐神實人依
爰自始建金湯肅陳祠宇奠茲中壘三百年來雖享非馨
未登列爵今則值予佐國連統藩維啟吳越之雙封爲東

南之盟主況遇金星應籙梁德克昌道旣泰於君臣澤遂
加於幽顯獲申奏薦遽降徽章今則象軸煥新龍綸遠至
表勲名於當代昭靈感於千秋固當永荷皇靈長垂幽贊
衛我藩宣之地遐清災沴之源保泰斯民乂安吾土烜矣
赫矣永作輝華今當吳越雙封一王理事亦仗土地陰隲
冥力護持神旣助今日之光榮予亦報幽靈之煥耀但慮
炎涼改易星歲徂遷不記修崇莫原事始聊刊貞石以示
後來時大梁開平二年歲在戊辰四月啟聖匡運同德功
臣淮南鎮海鎮東等軍節度使檢校太師守侍中兼中書

令吳越王錢鏐記

開舜井得重華石記

吳越國王寶正三年八月十九日重開舜井收得重華石一片竊恐年移代遠莫測端由特令鐫刻用記年月已丑歲林鍾之月二十九日天下兵馬都元帥吳越國王記

新建風山靈德王廟記

蓋聞天地氤氲運寒暑而滋品彙幽靈肸鬻司土地而福生民人神理在於相須顯晦期臻於感契雖先聖著難明之說而禮經垂嚴祀之文爰自五運相承百王理化或以

勞定國或盡力勤王或利濟及於蒸民或威烈光於史策
並皆立嚴祠於境土享廟食於春秋而況江浙古區魚鹽
奧壤厯象則區分牛斗封維乃表裏江山昔年霸越強吳
今日雙封列國曠代之靈蹤不少前賢之廟貌實多寡人
自定亂平祆勤王佐命五十年撫綏軍庶數千里開泰土
疆四朝疊受冊封九帝拱扶宗社改家爲國興霸江南一
方偃息兵戈四境粗安耕織上荷元宵眷祐次依神理護
持統內凡有往帝前王忠臣義士遺祠列象古跡靈壇悉
皆褒崇重峻於深嚴祀典常精於豐潔冀承靈貺同保軍

民其有風山靈德王廟本係屬城近歸畿甸考諸舊記即
先是武康縣風山又按史記云汪罔氏之君守封禺之山
今屬吳興武康縣稽立廟之初則年華渺邈詳圖牒之說
則詞理異同唯有元和年再構簷楹見存碑記彼旣已具
敘述此固不復殫論聊書封置之由直述旌崇之意丙戌
年春寡人以玉冊疊膺於典禮清宮未展於嚴禋遂輟萬
機暫歸錦里尋屬節當炎暑猶未却迴闕刺史陸仁璋佐
國精忠事君竭孝心懸扈從徧祝靈祇以風山靈德王昔
年因舉兵師曾陳禱祝無虧響應顯有感通遂懇悃告虔

許崇堂殿泊清秋却歸

闕

披覩

闕

陳旣忠誠感動神明行

褒贈先酬靈貺次乃親分指畫委仗腹心按山川展拓基

坳順岡阜增添爽塏形勝並皆換舊規模一概從新居中

而殿宇崇嚴四面而軒廊顯敞周迴戶牖甃砌堦墀構之

以杞梓榱桷飾之以元黃丹漆外則浚川源之澍澍內則

添竹樹之青蒼至於廣廈神儀崇軒侍衛車輿僕從帳幄

簾櫳鼎鼐庖廚邊簠器皿請福祈恩之所獻牲納幣之筵

並極鮮華事無不備丙戌年八月二十四日起首至其年

十一月畢功土木皆是精新禋祀常嚴豐潔仍展牲牢簫

鼓慶樂迎神耀威靈而萬古傳芳標懿號而千秋不朽一
則酬忠臣之啟願二則答陰騭之相扶唯冀明神永安締
構稟元化而同垂恩福鎮土疆而廕護軍民保四時風雨
順調闕永絕天災地沴常歡俗阜時康魏乎煥乎美矣盛
矣今則功用旣就良願已酬因勒貞珉聊書撫實所貴後
來賢彥知予精敬神明不假繁文粗紀年月時寶正六年
重光單閼歲爲相之月二十有三日記天下都元帥吳越
國王錢鏐

眞聖觀碑

欽定全唐文

卷一百三十

吳越武肅王錢鏐

六

若夫真聖之教大道爲先恍惚難名虛無罔象舛極於元

黃之始施功於融結之前籠罩九

闕

森羅萬物可大可久

元之又元豈推步之能窮非名言之可載太上老君者神

凝太素氣積混茫誕形雖感於星精崇德實標於道祖當

驪陸犧軒之代則同出而異名洎陶唐殷夏之年乃殊途

而一貫抗世立法爲師爲臣恢張沖漠之風振蕩希夷之

迹及乎姬周建國仙聖膺期託孕元姝寓形楚國指李言

姓視耳傳名雙柱三門式表儀形之異龐眉鶴髮更彰耆

耄之尊然而隱跡公朝韜光柱史魯宣父起猶龍之嘆尹

先生知望氣之祥莫不經演五千齡高八百唐朝將基王
業遠託真源廣啟元關累崇徽號由是普天之下悉立道
官皆以紫極爲名冀以奉行齋醮當府頃嘗建置歲月已
深後因大盜經過恣其煨燼緬惟道館久曠真風因爲重
興俾延多福竊詳載籍靜究源流但以老君稟虛無精應
混元氣託神明之質先天地而生在三皇五帝之時則自
號鬱華廣壽及殷商成周之代則官居柱史王師出入自
然應期而現後以周王之世再誕於苦縣瀨鄉道震中華
化行西域然而位居太乙尊號帝君統御十方施生萬物

配三光而普照綿萬劫以長生前朝欲濬靈源仰攀仙系
寧同血允聊比宗祊則老君自是大道之至真非唐家之
枝派夫軒轅大聖必問道於崆峒周穆至仁亦學仙於瑤
水是以追崇道教廣務勝因絳闕朱臺遠比蓬萊之境星
壇月殿大新焚醮之場必冀元功克臻靈貺其餘隙地間
植松筠白鹿青羊自遨遊於春嶺清風皓月更縈帶於秋
江立吳都元教之觀名千秋不朽改越國紫宮之真聖萬
載永隆足使大道常興真風不墜大顯元元之教永資邦
國之休宜刻貞珉式揚光烈

建廣潤龍王廟碑

蓋聞四靈表瑞則龍神功濟於生民百穀熟成則水旱事
關於陰陽而況浙陽重鎮自古吳都襟帶溪湖接連江海
賦輿甚廣田畝至多須資灌溉之功用奏耕桑之業錢塘
湖者西臨靈隱東枕府城澄千頃之波瀾承諸山之源派
梁大同中湖干嘗置唐咸通中刺史崔彥曾重修鑿石爲
門蒸沙起岸自予扶翊聖運移節建旄舊日湖隄盡爲城
宇澄渟有同於鏡水濟時每及於生靈一郭軍民盡承甘
潤逐年開豁森若泮關長居一尺之深關不竭元陽之失

度其中菰蓮鬱茂水族繁滋蒸黎實藉以畋漁河道常資
於灌注壯金城之一面不異湯池潤綠野之萬家常如甘
澤固有神龍居止水府司存降景佑於生靈興旱涸之風
雨原其自編祀典積有歲年雖陳奠醑之規未施展敬之
所蓋爲古來藩侯牧守不能建立殿堂予統吳越山河綰
天下兵柄前後累申祈禱皆致感通旣荷陰功合崇祠宇
昨乃特於湖際選定基垆躬興土木之功建立藥廬之構
至於殿庭廊廡門楹階墀悉親起規模指揮擘劃俱臻壯
麗以稱精嚴然後慎選良工塑裝神像威容赫奕冠劍陰

森陳將僚侍衛之儀列鐘鼓豆籩之位以至車轡僕馬帳
幄盤筵祭器爨廚無不臻備馨香薦獻不闕四時況鏡水
清流烟波浩渺其湖周百餘里其派數十餘川濟物於人
功能及衆亦無龍君之廟貌予遂與錢塘龍君一時建立
廟堂同表奏聞乞加懿號果蒙天澤並降徽章其所奉勅
旨具錄如後勅錢塘重地會稽名邦垂古今不朽之基繫
生聚無疆之福有茲舊跡特勅新規豈曰神謀實因心匠
蓋水府受天之職庇民之功歲時罔闕於牲牢祈禱必觀
於肸鬯得一方之義化致兩境之安康錢鏐普扇仁風久

施異政至誠所切遂致感通其錢塘湖龍王廟宜賜號廣
潤龍王鏡湖龍王廟宜賜號贊禹龍王牒至準勅旨若夫
人惟神贊神實人依信冥陽共理之言乃幽顯相須之義
今者式嚴廟貌永受烝嘗四時之殷薦不虧萬姓之禱祠
無闕神其受天朝之寵賚闕千古之光輝常鎮吳邦豫消
災沴必使原田肥沃克昌廣潤之名穀稼豐登更表土龍
之德今則嚴禋已立邃宇咸周聊記歲月刻於貞珉後來
觀者其鑒之哉

投龍文

大道弟子天下都元帥尚父守中書令吳越國王錢鏐年
七十七歲二月十六日生自統制山河主臨吳越民安俗
阜道泰時康市物平和遐邇清晏仰自蒼昊降佑大道垂
恩今則特詣洞府名山遍投龍簡恭陳醮謝上答元恩伏
願合具告祈兼乞鏐壬申行年四時履歷壽齡遐遠眼目
光明家國興隆子孫繁盛志祈元祝允協投誠謹詣太湖
水府金龍驛傳於吳越國蘇州府吳縣洞庭鄉東臯里太
湖水府告文寶正三年歲在戊子三月丁未朔二十六日
壬申投

吳越文穆王錢元瓘

元瓘字明寶初名傳瓘武肅王第七子乾寧元年授鹽鐵發運巡官又授金部郎中天祐中累授檢校右僕射梁貞明中進檢校太尉同中書門下平章事龍德二年加特進檢校太尉兼侍中後唐同光二年授開府儀同三司檢校太師兼中書令長興三年武肅王薨襲位改今名加守中書令四年封吳王應順元年進封吳越王晉天福元年授天下兵馬副元帥五年授天下兵馬都元帥六年加守尚書令八月薨年五十五諡文穆

乞復父舊號表

竊念臣父天下兵馬都元帥吳越國王臣鏐爰自乾符之
歲便立功勞至於天復之初已封茅土兩殄稽山之僭僞
頻叨鳳詔之褒崇賜鐵券而礪岳帶河藏清廟而銘鐘鏤
鼎歷事列聖竭誠累朝罄臣節以無虧荷君恩而益重楚
茅吳柚常居羣后之先赤豹黃熊不在諸方之後雲臺寫
像盟府書勲勦力本朝一心體國常誠臣兄弟曰汝等諸
子須記斯言父老起自諸都早平多難素推忠勇實效辛
勤遂蒙聖主之疇庸獲忝真王之列壤恒積滿盈之懼豫

懷燕翼之憂蓋以恩禮殊尤寵榮亢極名品旣逾於五等
春秋將及於八旬不諱之談爾當靜聽而況手殲妖亂親
覩興亡豈宜自爲厲階更尋覆轍老身猶健且作國王之
呼嗣子承家但守藩臣之分臣等鯉庭灑袂鴈序書紳中
心藏之敬聞命矣頃以濟陰歸邱梁苑稱尊所在英雄遞
相倣效互起投龜之詬皆興逐鹿之謀惟臣父王未嘗隨
例從微至著悉蒙天子之絲綸啟土封王自守諸侯之土
宇乙酉歲伏蒙莊宗皇帝遙降玉冊金印恩加曲阜營邱
顯自大朝來封小國遂有強名之改補實無干紀之包藏

兼使人徐筠等進貢之時禮儀有失尚蒙赦宥未寘典刑
敢不投杖責躬負荆請罪且爽爲臣之禮誠乖事上之儀
夙夜包羞寢食俱廢捧詔而神魂戰慄拜章而芒刺交并
伏以皇帝陛下濬哲文思含宏光大智周萬物日闢四方
旣容能改之非許降自新之恕將功補過捨短從長矧茲
近代相持豈足深機遠料且臣本道與淮南雖連疆畛久
結仇讎交惡尋盟十翻九覆縱敵已逾於三紀弭兵纔僅
於數年諒非脣齒之邦真謂腹心之疾今奉詔書責問合
陳本末端由布在衆多寧煩覲縷彼旣人而無禮此亦和

而不同近知侵軼荆門乖張事大儻王師之問罪願率衆
以齊攻必致先登庶觀後效橫秋鵬鷃祇待指呼躍匣蛟
龍誓平讎隙今則訓齊樓櫓淬礪戈鋌決副天威冀明臣
節伏以臣父王鏐已於汎海繼有飛章陳父子之丹誠高
懸皎日展君臣之大義上指圓穹其將修貢賦於梯航混
車書而表率如虧奉職自有陰誅今春已具表章未蒙便
賜俞允地遠而經年方達天高而瀝懇難通伏乞聖慈曲
行明命凌霜益翠始知松柏之心異日成功方顯忠臣之
節臣瓘等無任感激祈恩戰懼依投之至謹遣急腳聞道

奉絹表陳乞奏謝以聞

請建龍冊寺奏

襲爵四年曾無顯效受鳳池之真命降龍冊以雙封臣特
於府城外造寺一所前百步起樓號奉固其寺額乞以龍
冊爲名

楊瑫等改補節度子將牒

勅淮南鎮海鎮東等軍節度散子將充上直從散員旗副
將檢太子賓客楊瑫等牒奉處分前人教勇資身忠貞秉
志或屢隨征討或頻效飛馳予自紹統山河已曾遍施酬

獎昨者疊膺雙冊繼耀土茅今則特均雨露之恩溥示維持之命更聞盡節薦可甄外事須改補節度子將仍牒知者故牒清泰三年正月日牒

吳越忠懿王錢俶

俶字文德文穆王第九子晉天福四年除內牙諸軍指揮使開運四年出鎮台州是年忠獻王薨弟宏侖襲位內牙統軍使胡進思廢宏侖迎俶立之漢乾祐二年授東南面兵馬都元帥鎮海鎮東等軍節度使開府儀同三司檢校太師中書令杭州越州大都督上柱國吳越國王三年加

守尚書令周顯德中加天下兵馬都元帥宋建隆元年進授天下兵馬大元帥太平興國三年再朝京師遂上表納土封淮海國王雍熙元年改封漢南國王出爲武勝軍節度使尋改封南陽國王表辭國王改封許王端拱元年徙封鄧王八月薨年六十追封秦國王諡忠懿

宗鏡錄序

詳夫域中之教者三正君臣親父子厚人倫儒吾之師也寂兮寥兮視聽無得自微妙升虛無以止乎乘風馭景君得之則善建不拔人得之則延貺無窮道儒之師也四諦

十二因緣三明八解脫時習不忘日修以得一登果地永
達真常釋道之宗也惟此三教並自心修宗鏡錄者智覺
禪師所撰也總乎百卷包盡微言我佛金口所宣盈於海
藏蓋亦提誘後學師之智慧辯才演暢萬法明了一心禪
際河游慧閒雲布數而稱之莫能盡紀聊爲小序以頌宣
行云爾

黃妃塔記

敬天修德人所當行矧俶忝嗣丕圖承平滋久雖未致全
盛可不上體祖宗師仰瞿曇氏慈忍力所沾溉耶凡於萬

機之暇口不輟誦釋氏之書手不停披釋氏之典者蓋有
深旨焉諸宮監尊禮佛螺髻髮猶佛生存不敢私祕宮禁
中恭率瑤具創窳堵波於西湖之潯以奉安之規模宏麗
極所未見極所未聞宮監宏願之始以千尺十三層爲率
爰以事力未充姑從七級梯旻初志未滿爲慊計甃灰土
木油錢瓦石與夫工藝像設金碧之嚴通緡錢六百萬視
會稽之應天塔所謂許元度者出沒人間凡三世然後圓
滿願心宮監等合力於彈指頃幻出瑤坊信多寶如來分
身應現使之然耳顧元度有所不逮塔成之日又鐫華嚴

諸經圍繞八面真成不思議劫數大精進幢於是合十指
爪以贊歎之塔曰黃妃云吳越國王錢俶拜手謹書於經
之尾

梵天寺經幢記

竊以奉空王之大教尊阿育之靈蹤崇雁塔於九重衛鴻
圖於萬祀梵刹旣當於圓就寶幢是鎮於方隅遂命選以
工人鑿於巨石琢鞭來之堅固狀涌出之規儀玉削霜標
花雕八面勒佛頂隨求之嘉句爲塵籠沙界之良因所願
家國咸康封疆永肅祖世俱乘於多福宗親常沐於慈恩

職掌官僚中外寧吉仍將福祉遍及幽明凡在有情希沾
妙善乾德三年乙丑歲六月庚子朔十五甲寅日立

新建佛國寶幢願文

蓋聞慧炬西然法雲東被眷言興建實煥簡編我國家列
壤受封帶河礪岳旣勤王而繼世諒荷寵以乘時言念眞
宗聿懷多福於是旁搜勝景廣開宏規築湖畔之山岡構
城西之佛閣莫不遐森杞梓妙選榱桷營宰漢之基垆列
倚天之像設釋迦化主中尊而高儼睟容慈氏彌陀分坐
而淨標妙相仍於寶地對樹法幢雕築琅玕磨礱圭璧勒

隨求之梵語刊佛頂之祕文直指丹霄雙分八面伏願興
隆霸祚延遠洪源受靈貺於祖先助福禧於悠久軍民輯
睦疆場肅寧宗族以之咸康官僚以之共治四十八願永
符法處之良因八十種好更備曇摩之圓智得大堅固不
可稱量凡在舍生同躋覺路天下大元帥吳越國王錢俶
建時大宋開寶二年乙巳歲閏五月日

閩第六主王義

義初名延義閩太祖審知少子康宗遇弒自稱威武節度
使閩國王更今名改元永隆三年僭號皇帝六年爲拱宸

都指揮使朱文進閭門使連重遇所弑僭諡睿文廣武明
聖元德隆道大孝皇帝廟號景宗

奏晉帝書

久增景慕莫會光塵但循戰國之規敢預睦鄰之道一昨
安州有故脫難相歸邊校貪功乘便據壘矧機宜之孰在
顧茫昧以難申否臧皆凶乃大易之明義進取不止亦聖
人之厚顏適屬暑雨稍頻江波甚漲指揮未到事實已違
今者猥沐睿咨曲形宸指歸其俘獲示以英仁其如軍法
朝章彼此不可揚名建德曲直相懸雖認好生匪敢聞命

其杜光鄴等五百七人已令卻過淮北